



REGIONE AUTÒNOMA DE SARDIGNA  
REGIONE AUTONOMA DELLA SARDEGNA



COMUNU DE SESTU  
TZITADI METROPOLITANA DE CASTEDDU



*Ddu sciiast?*



Ddu sciiast chi oi est sa ricurrèntzia de s'armistitziu chi iat apaxiau su Rennu de Itàlia cun is Alleaus in su 1943?

A innantis de custa data, pruschetotu in su '42 e su '43, is bombas de is Alleaus iant fatu unu sciacu mannu de dannus in citadis e biddas de sa Sardìnnia. In Casteddu sceti nd'iant sciusciau prus de su 70% de is fàbricus, bociu centenas de personis e custrintu dexas de millenas de tzitadinus a si ndi furi aillargu.

Sa bidda prus acanta chi at sunfri is bombardamentus esti Pauli. Innoi su 31 de martzu de su 1943 dexeotu aparèchius americanus B-12, tzerrius fortilesas bolantis, iant bociu corantunu personis chi s'agatànt in is bixinaus a làcanas de s'aeroportu militari ghattendi prus de duamilla-cincuxentus "spetzonis" (de s'italianu "spezzone", arrogu in sardu, chi funt bombas chi candu scòpiant tirant àstulas in d'ònnia diretzioni, faendi ocidròxus).

Po sorti bona in Sestu non fiant arrutas bombas me in sa bidda ma teneus testimònias de calincunu ordìnniu scopiau in su sartu chi iat fatu tremi is domus. Po sa timoria de s'arribu de is Alleaus e chi is bombas ndi podiant sciusciai sa crèsia o sperdi is ainas sacras, su predi ddis iat serradas a intru de una càscia chi iat cuau in unu cofu fatu in sa sagristia bècia.

Sa màgini alliongiada amostat s'aeroportu militari de Pauli

